

續資治通鑑

冊
五

THE NEW YORK PUBLIC LIBRARY
ASTOR LENOX TILDEN FOUNDATION
1892

1892

續資治通鑑卷第二百

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

元紀十八

起屠維協洽正月盡上章浩難十二月凡二年

仁宗聖文欽孝皇帝

延祐六年春正月丁巳朔暹羅來貢方物 丁卯敕

福建兩廣雲南甘肅四川軍官致仕還家官給驛傳

如民官例 戊辰賑晉王部貧民 甲戌監察御史

富珠哩

舊作字九魯拙今改

等言皇太子位正東宮既立詹事

院以總家政宜擇年德老成道義厚重者爲師保賓

贊俾盡心輔導以廣緝熙之學拙嘗以御史巡按淮

東淮東憲司惟尙刑多致獄具拙曰國家所以立風

紀蓋將肅清天下初不尙刑也取其獄具焚之時凡

以吏進者例降二等從七品以上不得用狝言科舉
未立人才多以吏進若一概屈抑恐非持平之議請
以吏進者宜止於五品詔復舊制其犯贓者止從七
品著爲令 己卯廣東南恩新州徭賊龍郎庚等爲
寇命江西行省發兵捕之 帝謂達魯噶齊瑪魯舊作

札魯忽赤買閭今改

曰凡人命所繫其詳閱獄詞事無大小必謀

諸同僚疑不能決者與省臺臣集議以聞又顧謂侍
臣曰卿等以朕居帝位爲安耶朕惟太祖創業艱難
世祖混一疆宇兢業守成恆懼不能當天心繩祖武
使萬方百姓樂得其所念慮在茲卿等固不知也
二月丁亥朔日有食之改釋奠於中丁祀社稷於中
戊 丁酉雲南閣里愛俄永昌蒲蠻阿八刺等竝爲
寇命雲南省從宜勦捕 乙巳敕諸司不由中書奏

官而輒署事者罷之 三月丁巳以天壽節釋重囚

一人 辛酉以御史中丞圖圖哈爲御史大夫諭之

曰御史大夫職任至重以卿勲舊之裔故特授汝當

思乃祖乃父忠勤王室仍以古名臣爲法否則墜汝

家聲負朕委任之意矣 己巳敕諸王駙馬宗姻諸

事依舊制領于內八府勿徑移文中書 免大都上

都興和大同今歲租稅 夏四月壬辰中書省言雲

南土官病故子姪兄弟襲之無則妻承夫位遠方蠻

夷頑獷難制必任土人可以集事今或闕員宜從本

俗制可之 庚子帝如上都 以前中書右丞相特

們德爾舊作鐵木迭兒今改爲太子太師內外監察御史四十餘

人劾其逞私蠹政難居師保之任帝以皇太后故終

不用其言又嘗以臺事問集賢學士楊多爾濟舊作朶兒

只今

對曰非臣職事臣不敢與聞所念者德們德爾

雖去君側反得爲東宮師傅在太子左右恐售其奸則禍有不可勝言者帝亦不能用五月揚州火燬

官民廬舍二萬三千三百餘區六月辛丑置河南

田賦總管府隸內史府戊申置勇校署以角觝者

隸之庚戌大同縣雨雹大如雞卵詔以駝馬牛

羊分給朔方蒙古民戌守邊徼者俾牧養蕃息以自

贍仍議興屯田癸丑以羽林親軍萬人隸東宮

丁丑以濟寧等路大水遣官閱視其民之貧者賑之

仍開河泊禁聽民采食秋七月丙辰緬國遣人來

覲來安路總管岑世興叛據唐興州賜璽書招諭

之壬戌東宮增軍萬人置右衛率府丁卯諭江

西官吏豪民勿阻撓茶課甲戌皇姊大長公主作

佛事釋全寧府重囚二十七日帝聞之怒敕按問全寧守臣阿縱不法仍追所釋囚還獄八月甲申以

河東山西道宣慰使張思明爲中書參知政事先是

左丞相哈克繖

舊作合散今改

辭職帝不允其請益堅帝詰

之曰朕任卿未專耶曰非也近臣有撓政者耶曰無

有然則何爲而辭對曰臣自揆才薄恐誤陛下國事

若必欲任臣願薦一人爲助帝問爲誰哈克繖再拜

曰臣願得張思明卽日召用之

（攷異）元史宰相表張思明拜參知政事在閏八月

今從本紀作八月蓋八月召用閏月始上耳

庚子帝至自上都張思明謁見

于道帝曰卿向不負朕注委故因哈克繖言復起用

汝

是月伏羌縣山崩

閏月甲子浚會通河

癸

酉敕諸司有受命不之官及避煩劇託故去職者奪

其宣敕

九月甲申以奇徹爾爲中書參知政事

癸巳以作佛事釋大辟囚七人流以下囚六人 戊

戌增海漕十萬石 癸卯御史臺言比者官以倖求

罪以賂免請凡內外官非勲舊有資望者不許驟陞

諸犯贓罪已款伏及當鞫而幸免者悉付原問官以

竟其罪其貪汙受刑奪職不叙者竇緣近侍出入內

庭覬倖名爵宜斥逐之帝皆納其言 詔四宿衛嘗

受刑者勿令造內庭 浚鎮江練湖以圍田日多致

水泛溢也 賑濟寧等路飢 冬十月乙卯中書省

言白雲宗統攝沈明仁強奪民田二萬頃誑誘愚俗

十萬人私賂近侍妄受名爵已奉旨追奪請汰其徒

還所奪民田其諸不法事宜令覈問帝曰朕知沈明

仁奸惡其嚴鞫之 戊午授皇太子玉冊 辛酉以

達嚕噶齊特穆爾布哈爲御史大夫 癸亥上都民

飢發官粟萬石減價賑糶 己卯浚通會河 十一

月辛卯木邦路帶邦爲寇敕雲南省招捕之 庚子

中書省言曩賜諸王阿濟吉鈔三萬錠使營子錢以

給畋獵廩膳毋取諸民今其部阿嚕呼等出獵恣索

于民且爲奸事宜令宗正府刑部訊鞫之以正典刑

制可之 禁民匿蒙古軍亡奴 帝諭臺臣曰有國

家者以民爲本比聞百姓疾苦銜冤者衆其令監察

御史廉訪司審察以聞 翰林學士承旨趙孟頫乞

致仕南歸帝遣使賜衣幣促之還朝以疾辭不起

賑河間飢 十二月壬戌命皇太子參決國政太子

謂中書省臣曰至尊委我以天下事日夜寅畏惟恐

弗堪卿等亦當洗心滌慮恪勤乃職勿有隳壞以貽

君父憂也帝亦語左右曰前代皆有太上皇之號今

太子且長可居大位朕欲爲太上皇與若等遊觀西山以終天年羣臣皆稱善右司郎中魯特穆爾曰臣聞昔所謂太上皇若唐元宗宋徽宗皆當禍亂不得已而爲之願陛下正天位保無疆之業前代虛名何足慕哉 壬申平章政事王毅以親辭職從之仍賜其父幣帛 癸酉夜風雪甚寒帝謂侍臣曰朕與卿等居暖室宗戚昆弟遠戍邊陲曷勝其苦歲賜幣帛可不徧及耶 是月封宋儒周惇頤爲道國公 帝嘗謂左右曰儒者皆用矣惟虞伯生未顯擢耳遂以集爲翰林待制兼國史院編修集尋以憂歸伯生集之字也

延祐七年春正月辛巳朔日有食之帝齋居損膳輟朝賀 壬午御史臺言比賜布爾罕鼎山場鄂勒哲

布哈海舶稅會計其鈔皆數十萬錠諸王軍民貧乏者所賜未嘗若是苟不撙節漸致帑藏虛竭民益困矣中書省臣進曰臺臣所言良是若非振理朝綱法度愈壞臣等乞賜罷黜選任賢者帝曰卿等不必言其各共乃事

辛卯江浙行省丞相赫魯

舊作黑驢今改言

白雲僧沈明仁擅度僧四千八百餘人獲鈔四萬餘錠既已辭伏今遣其徒沈崇勝潛赴京師行賄求援請逮赴江浙併治其罪從之

丁亥帝不豫皇太子

憂形于色夜則焚香祈告於天曰至尊以仁慈御世庶績順成四海清晏天何遽降大厲不如罰殛我身使至尊永爲民主辛丑帝崩于光天宮年三十六太子哀毀過禮素服寢于地日歎一粥癸卯葬起輦谷帝天性恭儉通達儒術兼曉釋典每曰明心見性佛

教爲深修身治國儒道爲大在位七年不事遊畋不
喜征伐尊賢重士待宗戚勲舊始終有禮有司奏大
辟每慘惻移時其孜孜爲治一遵世祖成憲云 甲
辰中書右丞相巴達錫罷太子太師特們德爾以皇
太后命復入中書爲右丞相參議中書省事韓若愚
廉勤稱職特們德爾初爲相時以其不附己欲羅織
以事而不得遂至是復相乃誣若愚以罪請殺之皇
太子不從復奏奪其官除名歸鄉里 丙午遣使分
讞內外刑獄 戊申汰知樞密院四員 禁巫祝日
者交通宗戚大官 二月壬子罷造永福寺 賑大
同豐州諸驛飢 以江浙行省左丞相赫魯爲中書
平章政事 戊午祭社稷 建御容殿于永福寺
汰富民竄名宿衛者給役蒙古諸驛 辛酉中書平

章政事齊勒特穆爾御史大夫托歡竝罷爲集賢大學士 甲子特們德爾阿克繖請捕逮四川行省平

章政事趙世延赴京特們德爾以世延嘗劾奏其罪惡十三事銳意報復屬其黨何志道誘世延從弟索

哈爾哈呼

舊作胥益爾哈呼今改

誣告世延罪逮世延置對且使

諷世延啗以美官令告引同時異己者世延不肖從

行至夔州遇赦以疾抵荆門就醫特們德爾遣使督追至京師俾其黨煅煉成獄會有旨事經赦原者勿復問乃已 參議中書省事奇勒監坐鸞官刑部以

法當杖太后命笞之太子曰不可法者天下之公徇私而輕重之非示天下以公也卒正其罪 丙寅以

陝西行省平章政事趙世榮爲中書平章政事江西行省右丞穆布喇爲中書右丞參知政事張思明爲

中書左丞中書左丞完珠罷爲嶺北行省右丞 白
雲宗攝沈明仁以不法坐罪詔籍江南冒爲白雲僧
者爲民 己巳修鎮雷佛事於京城四門 辛未括
民間係官山場河泊窯冶廬舍 癸酉括勘崇祥院
地其冒以官地獻者追其直以民地獻者歸其主
丙子定京城環衛更番法準五衛漢軍歲例 丁丑
特們德爾以李孟初不附己奪其秦國爵及前後制
命仆其先墓碑 戊寅中書平章政事烏巴都拉罷
爲甘肅行省平章政事阿里哈雅罷爲湖廣行省平
章政事 特們德爾怨集賢學士楊多爾濟前爲中
丞時發其奸賊專制等罪而平章政事蕭拜珠在中
書牽制其所爲於是矯皇太后旨召多爾濟蕭拜珠
至徽政院與徽政使實勒們御史大夫圖勒哈雜問

之責以前違太后旨之罪多爾濟曰中丞之職恨不
卽斬汝以謝天下果違太后旨汝豈有今日耶特們
德爾請殺之皇太子曰人命至重刑殺非輕不宜倉
卒二人罪狀未明當白太后使詳讞之誅之未晚也
特們德爾乃引同時爲御史者二人證成其獄多爾
濟顧二人唾之曰汝等嘗得備風憲乃爲是犬彘事
耶坐者皆慚俯首卽起入奏未幾稱旨執多爾濟載
詣國門之外與蕭拜珠俱見殺是日風沙晦冥都人
恟懼道路相視以目

（攷異）虞集撰楊公神道碑云太后爲之
驚悔集奉敕撰文故不免有所回護其時

坐多爾濟以誣罔大臣罪名故
冤久不白非旣殺而旋悔也

後又欲奪多爾濟妻劉氏與

人劉翦髮毀容自誓乃免蕭拜珠之死有吳仲者潛
守其屍三日不去竟收葬之時特們德爾日思報復
仇怨誅戮不已張思明謂曰山陵甫畢新君未立丞

相恣行殺戮人皆謂丞相陰有不臣之心萬一諸王
駙馬疑而不至柰何特們德爾乃止 徽政院使實
勒們以皇太后命請更朝官皇太子曰此豈除官時
耶且先帝舊臣豈宜輕動俟予卽位議于宗親元老
賢者任之邪者黜之可也司農卿鄂勒哲布哈言先
帝以土田頒賜諸臣者宜悉歸之官太子問曰所賜
爲誰對曰左丞相哈克繖所得爲多太子曰予嘗諭
卿等當以公心輔弼卿於先朝嘗請海船之稅以哈
克繖奏而止今卿所言乃復私憾耳非公議也豈輔
弼之道耶遂出鄂勒哲布哈爲湖南宣慰使 三月
辛巳以中書禮部領教坊司 壬午賑陳州嘉定州
飢 瓜哇入貢 戊子征諸王駙馬流竄者給侍從
遣就分邑 庚寅皇太子卽皇帝位詔赦天下尊皇

太后爲太皇太后 壬辰太皇太后受百官朝賀于
興聖宮特們德爾進開府儀同三司上柱國太師初
太皇太后以周王和寶拉少時有英氣而帝稍柔懦
諸羣小亦以立和寶拉必不利於己遂定策帝既卽
位太皇太后來賀帝毅然見於色太后退而悔曰我
不擬養此兒耶 敕羣臣超授散官朝會毋越班

戊戌汰上都留守司留守五員 定吏員秩止從七
品如前制 辛丑禁擅奏璽書 壬寅降前中書平

章政事李孟爲集賢侍講學士特們德爾欲因其不
就陰中之孟拜命欣然帝謂特們德爾子巴爾濟蘇

舊作八兒
吉思今改

曰爾輩謂孟不肖爲是官今何如由是讒不

得行

御史臺請詔諭百司以肅臺綱帝曰卿等但

守職盡言善則朕當服行否亦不汝罪也 甲辰詔